

Taiòraa : Ruta Ev. 2.22-40

Tuaroì : Ruta Ev. 2.29-32. «E te Fatu, e tuu òe i to fāvini i teie nei ma te hau, ua au hoi i ta òe parau : ua ìte aè nei ta ù mata i te Ora na òe, i haapaòhia e òe i mua i te mata o te taata atoà nei; e tiàrama ei haamaramama i te Ètene, e ei hanahana no to òe ra taata no Ìteraera».

Ei haamanaòraa : Te haamanaò faahouhia atu nei tātou, te feiā taìò veà, mai te peu e, e pāhonora ta tātou i niā i teie uiraa, a faatae noa mai i te reira i te Piha Òhipa a te Veà Porotetani i te Faatereraa a te Etārētia i te Pū no Pāòfai.

Te tahi manaò tātara i niā i te taiòraa

I roto i teie taiòraa tei maitihia mai no teie tuaroì mātāmua roa na tātou no teie matahiti āpī 1997, te fāreerei nei tātou i teie parau no to letu āfairaa hia i te hiero no te pūpū ia na i mua i te aro o te Fatu e no te faataa ia na no te Fatu e ta na òhipa, i muri aè i to na peritomeraa hia e te mairiraa iòa, ia au i te faanahoraa no te ture a Mōte. Mai ta tātou atoà i mātaro noa i te parau e, te tamarī ra, e tufaa te reira e e taoà faatau-aroa na te Atua ia tātou, te taata nei. Eere rā teie tere no te haapaò noa i te parau no te tamarī, te vai atoà ra rā te tahi titauraa i te parau no te tāmāraa i to na metua vahine ia au i te peu e te ture a te Àti-luta (Revit.12.1-5). I roto i teie huru faanahoraa, mea titauhia te mau metua vahine Àti-luta atoà, i muri aè i te fānauraa e no te haapaò hoi i te peu no te tāmāraa, ia pūpū i te tahi tūtia na te Atua, mai te pinia māmoe, te ùupa, te ùuairao, etv... O te òhipa ia tei ravehia e Maria i roto i teie tere no rātou i lerutarema, no te titau i ta te Atua tāmāraa, ma te pūpū i te tūtia tei au i te feiā riiri.

Ia tae rātou i te hiero, te pārahi ra te hoè taata paāri i reira, o Timeona te iòa, te tiā ra i te haamahanahana o Ìteraera, oia hoi, te taeraa mai o te Metia. E taata parautiā teie e te haapaò maitai i te mau faanahoraa o te oraraa faaroo, e tei niā iho hoi ia na te Vārua o te Atua tei aratai ia Timeona e na metua o letu i roto i te hiero. I roto i te oraraa o te nunaa Àti-luta, te parau no te hoè Metia e tae mai, e parau rahi roa te reira e mau tutuaau noa hia ra e teie nunaa e tae roa mai i teie mahana, no te huru ihoā o te hāmani-ino-raa atoà ta rātou i faaruru noa mai te tau e te tau, ua pārahi noa rātou i roto i te tiatururua i te tahi Faaora o te haere mai e tātara i to rātou mau

fifi e te mau òpuaraa ìno atoà e ravehia nei i niā ia rātou.

Te ìte ra tātou e, noa atu teie mau parau tei riro i taua tau ra mai te tahi faīraa faaroo na Timeona e mai te tahi papa no te tiatururua o te perofeta vahine ra o Àna, no te Ora ta te Atua i horoà ia rāua na roto i te hohoà o teie tamaiti, teie ā ia teie nunaa e moemoeā ra i te tahi atu ā ora i rāpae atu i te mea o ta te Atua i faanaho no na e no teie nei ao. No Timeona, mai te mea e, ua tāpeà to na rima i te Ora, te pure nei o ia i te Atua, ia tuu i to na fāvini i teie nei, ia haere ma te hau, e o ia atoà teie e horoà atea nei i te mau tāpura e ravehia e letu i roto i to na tere i niā i te tino o te fenua nei. Eaha te mea o ta na e haapeapea faahou i teie nei, inahā, ua pāpū ia na e, pohe

noa atu ai o ia, te vai ra rā te tahi puai o te tiā ia na ia tūruī, māoti teie ora ta te Atua i faaineine no te mau taata atoà. I mua i teie mau parau e horoàhia nei e Timeona, te faahiahia nei o lotēfa rāua o Māria i te maitai rahi no taua mau parau ra, i ani atoà ai o ia i ta te Atua haamaitāraa i niā ia rāua, ma te haapāpū atoà e, e riro o letu ei hiāraa e ei faatiā-faahouraa no te feiā e rave rahi i Ìteraera, no te feiā tei pātoi e no te feiā tei fārii. E parau tohu teie tei faaitē atea i te òhipa a te Atua i niā i to na tiāraa haavā, na na e na na anaè e rave i te faaotiraa hopeà no te òhipa i ravehia e te



Photo : D. Margueron

taata i niā i te tino o te fenua nei, e te reira i mua i te parautiā a te Atua. Eita roa atu e tiā i te taata ia parau e, o mātou, e faaea noa ia i rōpū. Te auraa, aita o rōpū i roto i teie faanahoraa, no teie pae tātou, e aore ia, no terā pae mai.

Te uiraa : Eaha ta tātou pāhonora i teie mahana no teie horoà a te Atua i te taata, tei haamaitāhia e Timeona e o Àna i terā ra tau ?

Julien Mahaa

Pahonora i te Tuaroi n°9

Tuaroi Mataio 23/11

Uiraa : Eaha te papa no te tahi taviniraa mau ?

A fārii mai i te tapao no te here o to tatou Fatu ia letu-Metia i roto i teie nei pāhonora i te uiraa no ta tatou nei tuaroì ia au i te reo o te Fatu : «E te rahi i roto ia outou na, ei tavini ia no outou».

Hou te manaò pahonora i niā i teie uiraa, e mata na teie manaò i te fā i roto i ta tatou nei taiòraa. Inaha te parau pāpū tei lerutarema te Fatu i roto i te fare pure e te haapii nei i te auraa mau no te hinaaro o te Atua to na Metua, i te taata no to na ra ao mure òre, eiaha e tei ò nei anaè to te Fatu raverā i te haapiiraa i te taata no to na ao, tei te mau vāhi atoà rā i raterehia mai e ana. Mai te peu te parau ra teie manaò e tei lerutarema letu e ta na mau pipi e au atoà ia tatou ia parau e, e tei roto atoà letu i te hoè taima hopeà no to na oraraa i roto i teie nei ao. Inaha lerutarema e òire no lehova e tei reira hoi ta na parau i te vairaa. E na roto ia letu i teie hora hopeà, ua faatumu te tahi manaò i te na òraa e ua tae mai te reo no te Atua i rotopū ia luta. Oia mau no te tiaturū òre no teie nunaa maitihia i te Tamaiti a te Atua, noa atu te mau faaararaa na te Fatu ia ratou, e te òhipa tae noa atu ta na parau e faatupu ra, no ò mai i te Atua ra to na Metua, aita roa atu e ìtehia ra te tahi tiaturūraa pāpū i roto i teie mau aratai. Na roto i taua mau fā e ìtehia ra, inaha te tauturu mai nei te Atua i tana Tamaiti na roto i te reo no te ao Atua...

Ua ìtehia teie tairaa reo, a tahi i te pape no loritana, a piti i niā i te moua no Tapora e a toru te fatata maira

ia i to lerutarema, e ua faaroohia te reira i roto i te fare ta te Atua i horoà mai no teie nunaa māòhi, e te reira mau reo i papaihia i roto i te Evaneria no te Metia, te parau a te Atua, te Pipiria. Na vai te reo o te māòhi i tāpeà mai maori rā na te Pipiria. Eaha te ohipa e tupu nei i teie mahana i roto i te feiā maitihia e to te hau farani maori rā te imiraa i te mau raveà atoà eiaha teie reo ia oteo mai i roto i te oraraa no te māòhi. Na taua tumu atoà ra e faatea atoà nei i to tatou mau taata porotetani no te mea eita to ratou maramama e noaa faahou na roto i teie reo e na roto rā i te reo farani e i reira ratou e maramama ai. Tae noa atu i roto i te mau haapiiraa tāpati te faahepo nei te huru no te mau tamarī i teie mahana ia i te atoà te mau orometua pupu i te reo farani noa atu hoè noa hora no te reo māòhi. Teie te papa mau no te hoè taviniraa o to oe iho reo māòhi. Teie te papa mau no te hoè taviniraa o to oe iho reo. No te mea èere i te tàoà hamanihia e te taata nei.

E taoa rā na te Atua i te taata nei, nehenehe anei te hoè taata hamani e te rima o te mau aivanaa no te ao nei e parau i te hoè reo ?

Eaha te tute e òriorio ai i to letu parauraa ia na e eiaha ei maa faahou e hotu mai i niā ia òe ?

E ere anei ua tano te reo no te Fatu e te reo ta te natura e tiā noa ra ?

O Petero anaè tei parau i te mahana penetetote, hoè ahuru e ma hitu patireia o teie nei ao tei faaroo e tei òaòa no te mea ua parauhia te reo tatai tahi o te taata i taua mahana ra. Opaniraa i teie manaò, te reo e papa teie no te hoè nunaa, te reo e veà teie na te Atua i roto i te taata, te reo e mata teie no te ìte i te eà no te aroha o te Atua, te reo e pute ia no te hoè fenua.

Tenete 3/9-10
Ia ora na i te hau no te Metia